

Gobierno a firma permiso pa proyecto di Urirama



ORANJESTAD -- No obstante protesta di varios grupo, despues di un tardansa di 21 luna, pa december di otro año (2015), lo tin 8 molina di biento den funcion na Urirama. Gobierno a firma e permiso necesario pa e proyecto bira un realidad. Segun e persona responsabel di e compania cu tin e proyecto, sr. Henk Hutting, debi na e retraso, e costo mara na e proyecto a subi cu 5 miyon florin.

Les a detayenan riba pagina A2

Despues tardansa di 21 luna, Gobierno a firma permiso

8 molina di biento lo ta den funcion na Urirama pa fin di 2015



ORANJESTAD – Awo si ta un hecho cu pa december di otro aña, lo tin 8 molina di biento den funcion na Urirama. No obstante protesta di varios grupo, obheccion di grupo di habitantenan y un sin fin di reunion, Gobierno a firma e permiso necesario pa e proyecto bira un realidad.

E ta bin 21 luna despues cu e compania Windpark Urirama NV a entrega su peticion pa construi y opera un parke di molina. Tabata siman pasa, dia 29 di april cu Gobierno di Aruba a otorga e compania e asina yama 'Hinderwetvergunning', cu ta nifica cu e compania awor (e mesun compania cu ta responsabel pa e prome parke di molina na Vader Piet: red) por oficialmente cuminsa 'construi' e di dos parke di molina di biento, y despues opera esaki tambe. E hecho cu e la dura 21 luna largo (e compania a cuminsa cu e plan for di 2010), no tin mucho cambio pa raporta. E sitio ta keda 'esun di semper', esta na Urirama. Pero e costo mara na e proyecto (debi na e retraso) a subi cu 5 miyon florin segun e persona responsabel pa e compania cu tin e proyecto na su encargo, Henk Hutting a bisa Bon Dia Aruba ayera.

E comunicado oficial cu a keda lansa ayera mainta pa Hutting, a crea basta consternacion entre e gruponan cu a protesta contra e proyecto, y no ta descarta cu esaki lo haya bida atrobe aworaki.

Motibo di retraso

Segun Hutting, e retraso ta primordialmente pasobra cu prome minister Mike Eman a haya den un situacion fastioso 'debi na tur e rumornan, y a opta pa warda te despues di e eleccion'. Y si antes tabata pa-

pia di 10 molina manera cu ta e caso na Vader Piet, e parke aki na Urirama lo conta cu 'solamente' ocho (8). "Ocho of 10, no ta haci diferencia. E problema ta cu e ta bin sigur awor", un persona a comenta riba e red social Facebook asina cu e noticia a plama ayera merdia.

Comunicado

E comunicado cu ta participa cu gobierno a duna e compania Windpark Urirama NV e permiso necesario, y cu un dia despues (30 di april 2014) e compania consecuentemente a firma un acuerdo cu e compania di utilidad local WEB Aruba NV cu lo cumpra e energia produci pa e molinanan. Segun Hutting, awor nan por haci peticion pa e asina yama 'bouwvergunning' aunke tin cu warda prome riba e dunamento di tereno erfpacht na e compania. "Esey gobierno por haci solamente despues cu e plan di desaroyo ambiental (ROP) keda adapta, pa asina e por wordo incorpora den e decision di aña pasa di parlamento (aña pasa a trata esaki y a cera algun acuerdo y bin cu cierto condicion pa cu e binimento di e proyecto : red)" Hutting a sigui bisa. E ta kere cu pa juni di e aña aki esey lo por keda concretisa.

Precedente

E hecho cu gobierno a otorga e permiso na e compania no ta nifica si cu tin un tipo di 'acuerdo financiero' cu esunnan cu ta biba den e area, manera cu a sosode cu casonan similar na Europa. Na Belgica, entre otro, e companianan cu tabata involvi cu molinanan similar a compensa e habitantenan cu sumanan financiero. Aunke esaki tabata discuti pa Aruba, e no a sigui. "E lo a crea un precedente no desea. Si hendenan

wordo compensa pa un tipo di impuesto contra zonido, practicamente tur habitante na Aruba lo mester bin na remarca pa algo asina".

Hutting ta referi na entre otro hendenan cu ta biba banda di aeropuerto y cu por scucha avionnan subi, of pa hendenan cu ta biba banda di un caminda principal y cu ta scucha e zonido di auto henter dia. "Akinan (na Urirama: red) ningun habitante ta biba dentro di 1000 meter di e molinanan. Na Vader Piet tin hende cu ta biba 450 meter di e molinanan y nunca tabatin keho. Pues pakico compensa hende cu ta biba mas leu", Hutting a sigui bisa. Pa esunnan sinembargo cu no gusta e decision di gobierno, nan por entrega keho awor cerca e comision di LAR y spera nan contesta.

Consecuencia tardansa y cambio

E aumento di 5% na e prijs total, cu ta pone cu awor e suma total pa e proyecto ta bira 100 miyon florin na luga di 95 miyon inicialmente presupuesta, tin su motibo "E ta mas halto cu dos aña pasa como consecuencia di e valuta di e euro," Hutting ta duna como explicacion. Fuera di esey, casi tur cos ta keda mescos. Inclusive e compania cu ta bay maneha e parke aki. Solamente e NV lo cambia y bira Urirama NV na luga di Vader Piet NV. E mesun compania cu a suministra e turbinanan di biento na Vader Piet, esta Vestas, lo wordo uza, y Hutting ta sigura cu tur 4 trahado emplea lo ta Arubiano. Pa loka ta e turbinanan, nan lo produci 3 megawatt tambe, pero lo tin un rotor mas grandi di 112 meter na luga di 90 meter (cu tin na Vader Piet: red). E resultado

ta cu e ta genera mas coriente (debi na tecnologia mehora) y consecuentemente ta reduci e prijs di coriente.

Tambe a cantidad di turbina, a wordo reduci na 8 na luga di e original 10. Esaki ta un consecuencia directo di e reunionnan cu a tuma luga aña pasa y unda cu a concedi cu lo adapta e situacion pa complace habitantenan di Urirama y Alto Vista. E potretran adunto tambe ta ilustra e cambio visibel. Mescos cu ta e caso di Vader Piet, e consumo di e coriente ta primordialmente pa WEB, cu na su turno ta percura pa menos compra di azeta, cu ta nifica un reduccion di gasto. E reduccion aki ta loka cu lo beneficia tur hende segun Hutting.

Keho contra e parke

Un di e kehonan grandi pa tin e parke na Urirama, y cu pa varios luna tabata e unico topico di discusion na Aruba aña pasa, tabata cu ta stroba e naturalesa, kita e tranquilidad cu tin aworaki na e.o. Alto Vista y su kapel, y tambe tin menasa pa malesa scondi. Ademas, tabatin hende cu no tabata contento cu tabatin molina 'den cura di nan cas'. "Ner kier tur e beneficio, pero kien pa solamente esunnan cu tin molina na San Nicolas, tin e problema di e 'bista mahos.' Sinembargo segun Hutting, e realidad ta cu ponemento di e turbinanan aki na Urirama na luga di Vader Piet, ta scapa WEB 10 miyon florin na reserva di coriente. Pa motibo di e 'rumornan aki' pues, a pospone e proyecto te cu awor. Bon Dia Aruba a compronde, cu debi na e noticia aki, protesta, critica y keho a cuminsa zona y no ta descarta cu esaki lo bolbe lanta cabes awor cu gobierno a firma pa e parke aki bira un realidad. □